

nrey 7677


CFDOO
DIECET
E Siel

AUÉ

SUPLEMENT SETMANAU DETH DIARI **A V U I**

DISSABTE
28 DE HEREUER
DE 2004
N. 1043

Crearàn ua empresa entà gestionar eth Centre de Discapacitats d'Aran Era empresa gestora vòu deishar era activitat per manca d'expectatives economicas



Eth plen se celebrèc ena Casa deth Senhor d'Arròs

Redaccion VIELHA
Eth Conselh Generau vòu crear ua empresa damb participacion privada entà evitar eth barrament dera lauria que gestione era empresa Flisa e qu'auque discapacitats. Era empresa Flisa que se n'encuede deth centre ocupacionau entà discapacitats vòu deishar aguesta activitat per manca d'expectatives de negòci. Aguest motiu a amiat ath govèrn aranés a encargar un

estudi de viabilitat e sajar qu'es discapacitats non pèrden eth sòn lòc de trabalh. En plen celebrat dimèrcles tractèc er ahèr e eth Sindic d'Aran, Carlos Barrera, informèc as conselhèrs que se negòcie entà reconduir era situacion. Un aute des tèmes deth plen deth Conselh siguec era remassada de lordèrs. Sus aguest punt s'informèc dera crompa de 50 igloos de lordèrs entà distribuir per tota era Val d'Aran. Damb aguesta mesura eth Conselh sage de melhorar era remassada selectiva en Aran per'mor que

Barrera reconeish que i a auut problèmas en aguest prètzhet, totun senhale qu'en fòrça poblacions es coches son mau parcats e non permeten eth pas des camions. Eth plen deth Conselh tanben aprovèc catalogar coma Ben Culturau d'Interès Locau es glèises romaniques de Sant Estève de Betren e Sant Miquèu de Vielha. Per un aute costat, se balhèc lum verda ath reglament que regirà eth foncionament dera naua seccion d'Estudis Juridics der Institut d'Estudis Aranesi.

Un telesèra de quate places remplaçarà Pastors e Rabadan

Redaccion VAQUEIRA

Era empresa Baquèira Beret substituirà es telesquís de Pastors e Rabadan, plaçadi ena còta 1800 dera estacion, per un telesèra de quate places que s'instalarà ena part quèrra deth Mirador. Baquèira Beret SA a demanat ar Ajuntament deth Naut Aran es permisi d'òbres que ja compden damb eth vist e platz deth Consistòri. Es responsables de Mieï Ambient deth Conselh Generau d'Aran s'auràn de prononciar sus era viabilitat deth projècte. Eth pressupòst deth nau telesèra arthen es 2,4 milions d'èuros e melhoràrà era

Eth nau telesèra costarà 2,4 milions d'èuros

connexion de Baquèira damb Ôrri. Entad açò qu'ei as pistes de debutants de Pastors e Rabadan mantieràn es dues cintes transportadores actuaus ath delà de qué tanben es debutants poirà hèn usatge deth nau telesèra entà accedir tath sòn airau. Aguest nau bastiment correspon as acòrds as quaus arribèren era empresa e er Ajuntament deth Naut Aran entad açò qu'ei ar ahèr de Beret e era compensacion de Ruda. Atau donques, laguens des acòrds tanben s'includis eth remontador previst en Ruda e eth parcatge que se bastis.

Aguesta setmana en **AUÉ**

Recupèren era figura dera Convenença a Mieja Guadanheria

UA ditz que Vigesa a factures sense comptabilizar e CDA demane ua amassada

Avaloren positiuament era actuacion d'Endesa entad açò qu'ei as reclamacions presentades

Aran vòu recuperar era figura dera Convenença a Mieja Guadanheria

Consistie en despartiment des guanhs e patrimonni en cas de defuntament d'un des membres deth matrimòni

Redaccion
VIELHA

Representants deth Conselh Generau deth Poder Judiciau, deth Departament de Justícia dera Generalitat e deth Conselh Generau s'amassaràn era pròplèu setmana entà analizar e actualizar eth convengut que se signec en junh de 2001 entà

Generau d'Aran.


Aguesta figura juridica pròpria d'Aran que date dera edat mieja, sègle XIV, s'aperaue "Era Convenença a Mieja Guadanheria" e ère un acòrd o contracte que signauen es dues parts d'un matrimòni en quau se fixaue eth despartiment des guanhs en cas de mòrt de quauqu'un des membres. Era Mieja Guadanheria, que dejà se

tenguec en sègle XX, consistie en un acòrd que permetie ath veude o veuda quedar-se damb era mieitat d'aquerò aquerit e es guanhs des deth matrimòni estant. Ara se vòu recuperar era figura en tot adaptar-la ara societat actua.

En acte tanben se presentarà eth prumèr Prèmi Aran sus Institucions Juridiques Araneses.

Amassada en març des Institucions Juridiques Araneses

promòir era lengua aranesa ena justícia e possar atau es institucions juridiques araneses. En acte tanben se harà er anonci sus era recuperacion d'ua figura juridica deth Medioevo qu'en cas de defuntament d'un membre deth matrimòni protegie e salvagardaue es interessis principaument des hemnes. Aguesta prepausa ges dera Seccion Provisionau d'Estudis Juridics der Institut d'Estudis Aranesi e deth Conselh



Imatge deth Jutjat de Vielha

AUÉ



Bracs

Comencen es trabalhs dera varianta de Bossòst

■ Dejà an començat es trabalhs dera varianta de Bossòst, ena N-230, que permeterà as conductors esvitar eth pònt de Hèr qu'a estat denonciat per part deth consistòri en diuèrses escadences coma un des punts neres d'aguesta via. Eth bastiment d'aguest tram aurà ua longada de 900 mètres e aurà d'entrar en servici aguest madeish an. Eth còst des trabalhs dera varianta que finance eth Ministèri de Foment ei d'1,8 milions d'èuros. Era naua varianta non entornejarà eth nuclèu urban de Bossòst e era connexion damb era carretèra N-230 se plaçarà a 150 mètres deth pòble en direccion tà Vielha.

Era UTE que bastís eth nau tunèl aurà d'apariar es arrius damnatjats

■ Eth Conselh Generau d'Aran a demanat as empreses responsables deth bastiment deth tunèl de Vielha que presenten un projècte entar adobament des arrius Nere e Noguèra Ribagorçana dempús des vuedaments de residus liquids e solids detectats era darrèra setmana pes tecnicos deth Conselh e pes agents des Mossos d'Esquadra. Era demana deth Conselh ara UTE (formada per OHL, Comsa e Copcisa) tanben includís es barrancs de Molières e Conangles. Segontes eth Conselh, es informes indiquen ua nauta concentracion de lim que se place en 3000 milligrams per litre d'aigua.



OPINION

Lourdes Fernández Aunós

Esclariments sus eth cas dera Oficina de Recaptacion

En relacion ar article publicat en Aué eth darrèr dissabte damb eth titolar "Demanen 3 ans a ua empleada de Vielha per malversacion", voi realizar es esclariments que seguissen: 1èr. En nomentat article s'alludís a ua emplegada der Organisme de Recaptacion dera Deputacion de Lhèida destinada en Vielha sense identificar-la, au-mens pes sues iniciaus, qu'ei çò qu'abituaument se hè enes cassi enes quaus s'impute un hèt a quauqua persona. 2au. En mentat article se ditz qu'era imputada trabalhe ena Oficina de Vielha e, ath respècte,

è de manifestar qu'aguesta persona se ben non trabalhe actuaument ena oficina en èster suspènuda de trabalh, mès non de sòu, ei titolar coma foncionària dera plaça d'auxiliara administrativa ena Oficina de Vielha.

3au. Qu'eth descurbiment deth raubatge en Vielha, per enessim viatge ena istòria recenta dera Recaptacion, siguec realizat per qui redigís era presenta carta e metut en coneishement des d'alavetz as responsables

der Organisme Autonom (Director, Tresaurèr e Interventor), atau coma as maxims responsables dera Deputacion de Lhèida, eth President, eth Deputat responsable der airau d'Economia e Finances dera madeisha e President der OAGRTL.

Aguesti esclariments les hèsqui entà que d'aguesta faicçon non demore cap de tipe de dobeste dera mia onorabilitat e aunestetat e entà que finalizen es rumors qu'ath respècte s'an descadenat o que se poguen descadenar, especiaument en Aran a on toti mos coneishem.



Servicis

CONSELH GENERAU	973 64 18 01	GUARDIA CIVIL	973 64 00 05	NOTARIA	973 64 00 10
OFEA (FOMENT ARANÈS)	973 64 00 92	POMPIÈRS D'ARAN	973 64 00 80	RECAPTACION IMPÒSTI	973 64 02 78
TORISME VAL D'ARAN	973 64 06 88	ESPITAU VAL D'ARAN	973 64 00 06	MUSÈU D'ARAN	973 64 18 15
MOSSOS D'ESQUADRA	973 64 09 72	BAQUEIRA BERET	973 63 90 00	AUÉ (REDACCION)	973 64 30 51
		BURÈU TORISME VIELHA	973 64 01 10	GREMI D'HOSTALERIA	973 64 06 01
		CORRÈLS	973 64 09 12	LORDÈRES	973 64 18 01

CASTIÈRO

Vielha modifique eth sòn pressupòst en 391.000 € Martinez anóncie factures de Vigesa sense comptabilizar e Perdices demane amassada urgenta de Vigesa


Redaccion
VIELHA

Eth plen der Ajuntament de Vielha e Mijaran aprovèc dijais ua modificacion de crèdit deth pressupòst ordinari deth present exercici de 391 èuros entà hèr vials e equilibrar es chifres economicas de Vigesa. Precissament era empresa que gestione eth Palai de Gèu siguec era que merquèc eth desvolopament deth plen quan Pau Perdices, de CDA, rebrembèc ar alcalde Joan Riu qu'eth 18 de deseme de 2003 arribèc ath compromís de qué se gessie un remanent de tresoreria se destinaria a Vigesa degut ara situacion ena quau se trapaue. Perdices didec qu'er ajuntament pague actuaument eth crèdit de Vigesa e qu'açò non auie passat jamès. Eth còsso d'UA, Rufino Martínez, expliquèc qu'a 31 de

deseme de 2002 i auie factures impagades e non comptabilizadas de mès de 86000 € e tanben der an 2003 impagades pera valor de 40000 €. Eth còsso Perdices, en tot respòner a Martínez damb

Ensenhament dejà dispause de terren entath CRP e er EAP

un "s'açò ei vertat auriem de demanar eth cessament deth director. Jamès e auut coneishement de factures que non siguessen comptabilizadas", demanèc era convocatòria deth conselh d'administracion de Vigesa entà esclarir eth hèt. Eth plen tanben aprovèc modificar era plantilha der ajuntament entà crear era plaça



Eth plen der Ajuntament de Vielha s'amassèc dijais

der arquitecte tecnic. Ath delà, eth plen aprovèc per unanimitat mèter a disposicion deth Departament d'Ensenhament un terren de 400 mètres quarrats plaçat dauant dera escòla, en Betren, a on se

bastirà un edifici entà aubergar eth Centre de Recorsi Pedagogics e era Equipa d'Assessorament Pedagogica. A instàncies dera oposicion, eth plen aprovèc per unanimitat mèter condicions a

Ensenhament e que sigue eth terren a disposicion pendent tres ans. De un aute biais, era bastissa aurà de complir era sua finalitat pendent 25 ans, tostemp jos era aprobacion deth consistòri.

CASHIÈRO

Avaloracion positiua pes 241 reclamacions presentades

Es reclamacions se centren principaument en clients de Vielha e eth Conselh atiec eth 74% deth globau

Redaccion
VIELHA

Eth Conselh Generau d'Aran avalorèc dijais positivament eth foncionament dera sua Oficina d'Informacion ath Consumidor peth procediment d'atencion des 241 reclamacions que s'an hèt contra era companhia electrica Fecsa/Endesa per'mor dera pana deth darrèr 29 de deseme. Eth Sindic d'Aran, Carlos Barrera, didec qu'ath torn deth 37% des reclamacions dejà an estat resolvides, en tot qu'era rèsta son en procès d'analisi e estimacion. Era responsabla dera Oficina d'Informacion ath Consumidor, Carme Mora, remerquèc qu'era màger part des denúncies presentades son de Vielha. "Açò se pòt explicar peth hèt d'èster era localitat que patic era pana pendent mès temps, en tot arribar a 11 ores seguides sense electricitat, e tanben peth hèt d'èster eth lòc damb mès concentracion d'establiments". Era satisfaccion tanben arribèc des de Torisme Val d'Aran. Eth sòn director, Manèl Español, se mostrèc satisfèt donques eth 70% des reclamacions presentades per



Eth Conselh avalorèc es reclamacions presentades pr'amor dera pana de Nadau

èster autonòm toristic dejà an estat resolvides. Eth 74% des reclamacions sigueren tramitades des dera Oficina deth Consumidor. Eth 38% corresponentes a comèrç e

servicis, eth 27% a restauracion, un 13% a particulars e un 10% a lotjaments. Es bars un 7%, es professionaus independents un 3% e eth 2% restant a d'auto.



Bracs

Convengut enter ETEVA e EMGRA

■ Era Escòla de Tecnic Esportius dera Val d'Aran (ETEVA) e eth Club Excursionista de Gràcia a traùers dera sua escòla de montanha, EMGRA, signèren deluns un convengut de colaboracion entà compartir es diuèrsi cicles formatius d'iniciacion e perfeccionament. Eth convengut tanben includís era contunhitat dera formacion reglada entad aqueri estudiants que desiren dispausar d'ua formacion contunhada ath laguens der encastre des espòrts de montanha. Era Escòla de Tecnic Esportius dera Val d'Aran realizarà es pròves d'accès as ensenhaments de montanha e escalada que se haràn deth 4 ath 8 de març, maugrat que poirien modificar-se segontes es condicions meteorologuicas.

Darrèra ora



Amassada deth Sindic d'Aran damb eth Bisbed'Urgelh

Eth Sindic d'Aran, Carlos Barrera, e era Conselhèra de Cultura, Mercedes Delaurens, s'amassèren dimèrcles ena Seu d'Urgelh damb eth Bisbe Joan Enric Vives entà prèner acòrds tà pr'amor de facilitar es intervencions de caràcter d'apraiment e de conservacion qu'eth Conselh hè enes bens mòbles e bens immòbles deth patrimòni eclesiastic d'Aran. Era amassada tanben servic entà avalorar es inversions qu'eth Conselh hè. Eth Bisbe les cataloguèc

d'importantes e didec que se seguís un bon procès ena conservacion der art sacre deth parçan. Atau donques, es dus mandataris acordèren elaborar, damb eth consentiment des parròquies d'Aran, un protocol entà emmarcar es relacions en aguest encastre. Dera amassada sorgic er acòrd de nomenar ua comission assessora entà determinar es intervencions mès apropiades e es diuèrses actuacions a realizar.



Bracs

CDA-PNA vòu mès participacion e implicacion dera militància en partit

Convergència Democratica Aranesa apòste entà que tota era militància participe e s'implique laguens de toti es organs que compausen eth partit. Aguest ei er objectiu prioritari que ges deth Conselh de Terçons celebrat aguesta setmana en Betren. Carlos Barrera hec ua avaloracion sus era actualitat dera politica catalana e sus eth projècte politic que CDA-PNA amie a tèrme en govèrn d'Aran.

Pera sua part, eth president dera formacion politica, Josèp Loís Boya, metec de manifest era importància de contunhar en tot trabalhar toti amassa enes pròpleu ans damb ua politica sense desqualificacions.

54 nauï cavòts en cementèri de Vielha

Eth cementèri municipau s'agranirà damb 54 nauï cavòts, segontes hònts der Ajuntament de Vielha e Mijaran qu'informèren qu'eth projècte ei en informacion publica. Aguesti se plaçaràn ena zòna a on se trapan es 16 cavòts anonims dera fin deth sègle XIX, totun er ajuntament demane as vesins que s'an informacion sus aguesti defunts ac comuniquen ath consistòri.

Aran acuelh es Mondiaus d'Esquí de Montanha

A compdar de dimars se celebraràn en Aran es Campionats deth Mon d'Esquí de Montanha qu'amassaràn a 300 esquaiers de trenta païsi. Era pròva de seniors aurà un recorrut de 50 quilomètres e un desnivèu de 5600 mètres. Pendent quate dies es participaires passaràn per 4 somès.



ara que i èm

Jusèp Loïs Sans

Violència

Coneishi massa cassi d'aranesi, sustot araneses, que son objècte de violència domètja. Era sua parelha les pataquege de forma periodica. Ac supòrten peth compliment de compromisi o per dificultat d'emancipacion. Açò m'aumplís de ràbia e mès encara quan me trapi damb interpretacions simples sus es motius qu'ac provòquen. Entad aqueri que s'i trapan eth procès ei massa complicat e massa dolorós coma entà simplificàc ena Pastoral dera Glèisa Espanhòla quan assegure qu'era crisi dera fa-

milha tradicionau ei producte dera revolucion sexuau e qu'açò produsís entre d'outes causes era violència domètja. Dilhèu vòlen rebrembar era Carta as Efèsis quan ditz que cau qu'as hemnes siguen sometudes as sòns òmes coma ath Senhor, per'mor qu'er òme ei cap dera hemna, coma Crist ei cap dera glèisa e atau coma era

glèisa ei subjècta a Crist, tanben es hemnes n'an d'èster as sòns òmes en tot'. Dilhèu cau rebrembar que de matractaments hè fòrça ans que n'ia, incluides es epòques dera familia tradicionau. Entà esvitar era revolucion sexuau encara existissen escòles de primària desseparades per sèxe; en Catalonha n'ia sies. Era seleccion deth

professorat e d'aute personau hè mantier hemnes enes escòles de mainades e òmes enes de mainatges. Son escòles restacades a un sector dera glèisa catolica. Açò tanben genèra violència. E s'ac volem barrer tot, entre es capelhans n'ia massa qu'an generat situacions d'abús sexuau en tot emparar-se ena sua condicion. Enes Estats Units mès de 4400 capelhans catolics i son involucrats. Non voi èster simple ne vulgar. Qu'era glèisa tanpòc ne sigue; i a matractaments en d'outes cultures.



DAMB ERA COLLABORACION DETH DEPARTAMENT DE PRESIDÈNCIA DERA GENERALITAT DE CATALUNYA E DETH CONSELH GENERAU D'ARAN

